

He P'aki He P'aya

Awor ku tantu karnaval ku kuaresma ta tras di lomba, den e próksimo simannan polítika ta bai dominá notisia. Listanan ta finalisá. Programa di akshon ta prepará. Hopi esfuerso, promesa, i sèn ta dediká pa gana e privilegio pa goberná. Arthur Sealey ta hasi su enkuestanan, purbando pa determiná kua partido lo sali viktorioso.

Na algun pais, tin enkuesta pa kasi tur kos: Mester legalisá droga? Kriminalidat òf e ekonomia ta e problema prinsipal? Aborto ta bon? Mester manda soldá na Kosovo? Ets. Enkuestanan tin nan lugá. Ma nos tin problema serio ku e manera gobernantenan na algun pais ta uso e informashon deskubrí dor di enkuestanan.

Ta un sekreto públiko ku hopi polítiko merikano ta goberná via enkuesta. Nan ta analisá loke un òf otro enkuesta ta bisa promé ku nan ta disidí kua perspektiva ta mas favorabel pa nan popularidat. Nan tin ku chèk un enkuesta pa disidí nan punto di bista awe. Nan no ta goberná a base di prinsipio. Pa nan, nada ta bon òf malu. **“Bon” ta loke e enkuesta ta indiká ta popular i “malu” ta loke no ta popular.** Nan ta papia masha bunita, bisando loke hende **ke** tende, no loke nan **mester** tende. Esei ta gobernashon a base di interes propio.

Nos islanan no tin tantu enkuesta. Ma e mesun mentalidat ta eksistí den nos komunidat. Hopi polítiko ta ahustá nan palabranan i akshonnan na loke ta popular na lugá di prinsipio. Awe nan ta favorese algu ku ayera nan ta refutá. Awe ta “he p’aki”, mañan ta “he p’aya”. Na lugá di determiná kiko ta bon i kiko ta malu, anto hasi loke ta korekto, nan ta para averigua promé den ki direkshon nan siguidónan ta bai, anto purá ta kore bai nan tras...**siguiendo esnan ku supuestamente ta nan siguidónan.** Anto nan ke sa ku nan ta **lídernan?**

Talbes bo ta puntra, “Ta robes pa hasi loke mayoria ta deseá...loke ta popular?” Ta dependé kiko mayoria ta deseá. Si nan ke loke ta bon, esei no ta problema. Ma mayoria **por** kiboká i deseá algu malu. I Dios por duna hende loke nan ke, maske e ta pèrhudiká nan. *“El a duna nan loke nan a pidi, ma a manda flakesa den nan alma”* (Salmo 106:15). Un líder mester tin e wesu di lomba pa para pa loke e sa ta bon...asta ora mayoria ta oponé kontra su opinion.

Den era di Kristobal Kolón, mayoria hende a pensa ku mundu ta plat. Un tempu, mayoria a favorese esklabitut. Mayoria a chèrcha Edward Jenner su invenshon: vakuna. Ponsio Pilato, hasiendo loke mayoria den su presensia a deseá, a laga krusifiká Hesus...i a kometé e blúnder mas grandi di tur era. **Djis pasobra mayoria ta favorese siertu opinion, no ta indiká ku nan tin rason.**

Si weganan di plaka ta robes, un gobernante di prinsipio lo no “kijk door de vingers” maske e ta produsí entrada pa gobièrno. Si siertu tipo di turismo lo tin un afekto negativo riba moralidat di nos islanan, un mandatario ku wesu di lomba lo pone pia abou maske e ganashi lo duna un empuhe supstansial na nos ekonomia. Si un gobernante ta mira ku un lei ta debilitá matrimonio, e lo opon’é maske e lei ta popular. Un bèrdadero líder lo vota segun su konsenshi maske tur kolega di su mes partido ta vota kontrario. Ta e tipo di gobernante ei ku nos tin mester!

Añanan pasá, Henry Clay a kampañá pa bira presidente di Merka. Na mésun tempu, siendo representante di su estado den gobièrnu, e tabata bai hasi un proposishon estatal. Un amigu a konseh’é pa no trese e proposishon dilanti, òf sigur e lo mata su chèns pa bira presidente. Señor Clay a puntr’é si su proposishon ta korekto. Ora e amigu a kontestá “si”, Clay a respondé, **“Mi ta preferá ta korekto ku presidente.”**

Elekshon ta dilanti porta atrobe. “Dios, duna nos mandatarionan ku ta ‘preferá ta korekto ku presidente’ na lugá di esnan ku ta balia riba e piesa ‘he p’aki, he p’aya’.”